

26)

*DISSE*  
*RAT**O IN AVGVRALIS*  
*DE*  
*FORTVNA ET PRVDENTIA MEDICA*

---

QVAM  
RECTORE ACADEMIAE MAGNIFICENTISSIMO  
SERENISSIMO DVCE AC DOMINO  
DOMINO  
**CAROLO AVGVSTO**  
DVCE SAXONIAE IULIACI CLIVIAE MONTIVM ANGARIAE  
ET GVESTPHALIAE REL  
AVCTORITATE  
GRATIOSI MEDICORVM ORDINIS  
P R A E S I D E  
**CHRIST. GODOFREDO GRVNERO**  
MED. DOCT. SERENISS. DVC. SAXO-VINAR. ET ISENAC  
A CONSIL. AVL. BOT. ET THEOR. PROF. PVBL. ORD  
FACVLT. MED. ASSESS. ACAD. IMPERIAL. NAT. CVR. ET  
ELECT. MOGVNT. SCIENT. VTL. SODALI  
PRO GRADV DOCTORIS  
SVMMISQVE IN MEDICINA HONORIBVS  
RITE CAPESENDIS  
D. XXII. OCTOBR. CCCCCCLXXVI  
HORIS ANTE- ET POMERIDIANIS DEFENDET  
AVCTOR  
**IOANNES HENRICVS LVCAS**  
SALVNGA-MEININGENSIS.  
\*\*\*  
I E N A E  
LITTERIS STRAVSSIANIS

ЯОТОЧК

JOANNE HENRICA PACS

• 2014年03月23日 - ADMIN

Р А И З

СИЛА ЗАВАЛТЪ 21 ЯНВАРІ

VIRO  
PRAECELLENTISSIMO CLARISSIMO  
ET PERQVAM STRENVO  
**WOLFG. EM. VOLCKARDT**  
SERENISSIMAE DOMVS MEININGENSIS A CONSI-  
LIIS ET PRAEFECTVRAE SALZVNGENSIS  
PRAEFECTO.

PATRONO ET FAVTORI  
PIE COLENDO.

NEC NON  
**C O N S V L I B V S**  
ATQVE  
**S E N A T O R I B V S**  
CIVITATIS SALZVNGENSIS  
MERITISSIMIS  
PATRONIS OPTIMIS

ALIO  
PRAECELESTISSIMO GLORIOSO  
AT TRINUM STRINUM  
MOLULUS ET GLOKUS  
TRINUS ET GLOKUS  
GLOKUS  
IN CONVENTU ET GLOKUS  
IN CONVENTO.  
Nec non  
CONVENTUS  
AVTA  
SENATORIUS  
CIVITATIS SALISUENERIS  
MERITISSIMIS  
PATRONIS OPTIMIS

DENIQUE

V I R O

PRAECELLENTISSIMO ET EXPERIENTISSIMO

IOANNI FRIDER. GLASER

MEDICINAE DOCTORI PRAEFECTVRAE ET CIVI

TATIS SVHLANAЕ PHYSICO ACADEMIAE IM

PERIALIS NATVRAE CVRIOSORVM BAVARICAE

ET MOGVNTINAЕ SCIENTIARVM VTLIVM

COLLEGAE

PATRONO ET FAVTORI

SVMMOPERE DEVENERANDO

HASCE

PRIMITIAS ACADEMICAS

D. D. D.

ATQVE

S E R E S Q V E S V A S

O M N I

QVA PAR EST

HUMANITATE AC PIETATE

COMMENDAT

COLLEGAE

PROTULAT TE OIORTA

IOANNES HENRICVS LVCAS.



## PRO O E M I V M

  
Euoluenti mihi nuper **HIPPOCRATIS** Coi mo-  
nimenta, quibus vera doctrinae medicae se-  
mina contineri aiunt, qui acutioris in indagan-  
do naris sunt, occurrit peropportune hoc effatum \*) prae-  
clarum et nostra adhuc aetate verissimum:

*Qui sic medicinam nouit, minime fortunam respicit  
aut exspectat, sed et citra fortunam, et cum fortuna, recte  
faciet. Constans enim ac firma est tota medicina, et doctri-*

A

nae

\*) De Loc. in Hom. §. 58. p. 399. T. I. ed. LIND.

nae optimae in ipsa compositae, minime fortuna egere apparent. Nam fortuna sui iuris est, et nullius imperio subest, neque optantis est ad ipsam peruenire. Scientia vero imperata facere cogitur, et facile est, ipsam feliciter adsequi, si quis sciens vti velit. Deinde vero quid opus est medicinae fortuna? Si enim morborum medicamenta clara sunt et manifesta, velut equidem arbitror, non exspectant sane fortunam ad sanandos morbos, siquidem sunt medicamenta. Si vero cum fortuna exhibere ipsa prodest, non magis medicamenta, quam ea, quae non sunt, faciunt. Quicunque vero fortunam ex medicina aut alia quapiam arte expellit, dicitque eos, qui probe rem aliquam sciunt, fortuna non vti, is contrarium mibi indicare videtur. Mibi enim soli hi fortunate adsequi, itemque infornunate non adsequi videntur, qui recte quid, et male facere sciunt. Fortunate enim adsequi, est recte facere; hoc autem qui sciunt, faciunt. Non adsequi autem hoc est, si quis non sciat, hoc non recte faciat. Indoctus autem qui est, quomodo fortunate adsequi possit? Si quid enim et-

iam

*iam adsequatur, non memorabilem sane successum habebit.*

*Qui enim non recte quid facit, non fortunatae adsequi poterit,  
cum reliqua, quae aequum est facere, non faciat.*

Ex his colligitur, diuinum senem aut quisquis auctor libelli est, vere naturaeque rei perapposite statuisse, bonum fortunatumque medicum futurum neminem, nisi qui litteras et disciplinas medicas rite didicit, et ubi ad aegrorum lectulos ventum est, doctrinam singulis morbis bene accommodeare nouit, non nomina morborum, non pyxides et medicamentorum farraginem sufficere, parum aut nihil valere casum fortuitum atque opinionem vulgi ad medici boni dignitatem et consequendam, et integrum seruandam; contra infelicitem futurum, cui haec ingenii doctrinaeque medicae bona desint, et etiamsi interdum salus aegri reddatur, illud non arti, sed benignitati morbi et naturae aegri deberi; hinc cauendum videri medicum, qui tabernam medicamentariam, tonstrinam, sutrinam vel ouile olet, quia quod quis ignorat, nec habet, nec inuenire, nec adhibere potest, et poetae elogium,

*Quot Themison aegros autumno occiderit uno*

illi accinere aequum est. Neque tamen spernendam adeo fortunam esse, quia medici officia sine hac dextre obiri non possint.

In quo quia etiamnum delinquitur, et multi sunt, qui medico optimo detrahere se posse putent, si fortunam ei adesse aiant, scientiam negent; operae pretium esse duxi, hoc potissimum argumentum mihi sumere, et, quam qualemque *fortunam medicam* esse statuam, quid in hanc *res externae* valeant, edifferere. In his vero principem locum occupare videtur *prudentia medica*, quia sine hac nec ingenii acumen, nec doctrinae praestantia, nec morum castimonia, nec religionis vis, nulla sunt.

Qua de re placet utrumque coniungere, et medicorum osores docere, quam male intelligent, qui bonus malusue medicus habendus sit: Quos ego, quia haud raro sibi soli sapiunt, monere \*) possum; corrigere non possum.

DISSE-

\*) Vide, si placet, locum **AVGVSTI** ap. **MAEROZ**. Saturn. II. 4.

DISSERTATIO IN AVGVRALIS MEDICA

DE

FORTVNA ET PRVDENTIA MEDICA

§. I.

**V**aria fortunae vis et potestas est. Multis \*) enim idem, quod fatum, esse videtur, *necessitas rerum omnium actionumque, quam nulla vis rumpat*; aliis vero, quod *astrorum coitus*; aliis, quod *casus caecus et fortuitus*, ideoque nec in eam ars et doctrina humana quicquam valere creditur, si quidem ea, *quae fortunae \*\*)* debentur, *nulla hominum prudentia fiunt*, sed ita eveniunt, ut aliter evenire non possint. Hinc TULLIUS \*\*\*): *Quid est aliud fors, quid fortuna, quid casus, quid euentus, nisi cum sic aliquid cecidit, sic evenit, ut vel non cadere ac evenire, vel aliter cadere, atque evenire potuerit.* Alii denique fortunam sic definiunt, ut exinde facile intelligas, plurimos hominum ne nosse quidem, quid statuant, et etiamsi minus commode verba faciant, tamen acriter de verbis disputare, ut sapere videantur.

§. II

Quae opinionum diuersitas diuersam fecit *fortunae medicae* definitionem. Etenim tantum non omnes, vbi eam medico dant, caecum, brutum et insanum aliquod fatum vel

A 3

casum

\*) SENECA Quaest. Nat. II. 36. seq. p. 632. ed. Lips.

\*\*) PLATO in Men. p. 427.

\*\*\*) De Diuinat. II, 6.

casum fortuitum, opinantur, eique omnem artis suae ac scientiae vim denegant, sic, ut cum SENECA \*) ratiocinari, quam verum confiteri malint. *Aut futurum est, aut non.* *Si futurum est, etiam si susceperis vota, fiet.* *Si non est futurum, etiam si non susceperis vota, non fiet.* His vero ratiociniis confisi existimant, rem omnium optime esse transactam, neque cogitant, nihil temere et indicta caussa esse statuendum, sed vna publice profitendum \*\*), vota (artem et medicamenta) proficere, salua vi ac protestate fatorum. *Quae-dam enim a diis immortalibus ita suscepta relicta sunt, ut in bonum vertant, si admotae diis preces fuerint, si vota suscep-ta,* (si medicamenta, morbo contraria, dextre adhibita). Tunc certe, me quidem iudice, quis aeger non forte fortuna, sed scientiae medicae beneficio e vitae periculis mortisque fauibus eripietur, et ceterae *res externae* ita accident, ut salus eius desperanda non sit. Qua de caussa hanc demum *fortunam medicam esse censeo, si qui medicus, artis suae peritus, praesentis conditionis futurique euentus prouidus, propositi ex scientia tenax, agit, quae artis sunt, neque ei molienti aeger vel amici resistunt.* Tunc mehercle mira omnium quasi rerum in salutarem euentum adest conspiratio, et, fortuna \*\*\*), duce, scientia arbitra, verus vitae necisque imperator medicus esse debet. *Quae si tollis, fortunam ipsam,*  
quam

\*) Ib. c. 37. p. 633.

\*\*) L. et p. cit.

\*\*\*) Cf. HIPP. De Arte §. 5. p. 3. seq. T. I. ubi plurima aduersario-um, omnia fortunae referentium argumenta bene confutantur: KNIP-HOF Diff. Exhib. Cogitat. circa adagii valorem, nouo med. nouo opus est coemeterio p. 16. sequ.

quam vulgo in medicorum ignominiam adferunt, tolli necesse est.

§. III.

Ex his clucet, medicum fortunatum fore neminem, nisi quem *scientia* et alia omnia, quae paullo post singulatim censemus, ad beatam artem iuuant. Si enim verum est, usum et experientiam non sufficere ad artem aliquam perite scienterque obeundam, nisi superaccedat ingenii vis et doctrinae quaedam praestantia, id certe cum maxime in medicina locum habere debet, quoniam unica morbi causa saepenumero latet, nec sensibus obvia est; quam eruere ac inuenire, hoc opus, hic labor est. Quare si quis illam fortunam praeopet, videat, primum, utrum *naturam* fautricem in tribuendis animi dotibus expertus sit, nec ne; Quae vbi desunt, manca et imperfetta erit omnis doctrina: vbi vero adsunt, incredibiles in litteris progressus faciat necesse est. Deinde omnem cautionem adhibeat, ne, dum *magistri* eligendi sunt, in thrasones vnguentatos vel mercenarios senes incidat, qui sibi soli plaudunt, ceteros spernunt, multa pollicentur, sed pauca re ipsa praestant; sed nugas, ampullas et sequipedalia verba fundunt, medicinam seculi, quo studiis operam dare coeperunt, identidem repetunt ac declamant, recentiorum inuenta aut ignorant, aut negligunt, quoniam iis fere debentur, quibus nec caput incanum, nec barba promissa inest, at sapientia vegeta, haud spernenda ingenii vis, eruditio omnium seculorum spoliis comparata. Hos venerari ac coleres fas est, illos quoquis modo fugere; nunquam vero in verba magistri

gistri iurare. Etenim sub auctore TULLIO non tam auctoritas, quam rationis momenta quaerenda sunt. Quin etiam obest plerumque iis, qui discere volunt, si vehementer alterius opinioni sunt addicti et auctoritati eorum, qui se profitentur docere, quoniam desinunt suum iudicium adhibere, idque caecis oculis, absque ullo veritatis examine, habent ratum, quod ab eo, quem probant, iudicatum (et dictum) vident.

Hinc multum intereat, a pueris et per iustum temporis spatium litteris nauasse operam, sub optimis artis professoribus profecisse, in athenaeo claro enutritum educatumque esse, a philosophia et humanitatis studiis, sine quibus doctum perfectumque medicum putem neminem, non rudem, et in medicinae mysteriis sic initiatum esse, ut ne tandem, vbi maturior aetas successerit, pristinae vitae poeniteat. Haec peraccommodate diuinus senex \*):

*Quisquis medicinae scientiam sibi vere comparare volet, eum his ducibus voti sui compotem fieri oportet, natura, doctrina, loco studiis apto, institutione a puer, industria, tempore. Primum quidem omnium natura opus est: Natura enim repugnante, irrita omnia fiunt. Si vero natura ad optima viam demonstrat, artis doctrina facile contingit: quam sane cum prudentia sibi comparare oportet, ita, ut a pueri institutio accedat, atque id in loco, a natura ad disciplinam apto. Amplius autem et industriam adhibere oportet, eamque ad multum omnino tempus, quo disciplina ipsa insita feliciter et cum profectu fructus suos producent cet.*

Deni-

\*) De Leg. §. 2. p. 41. et. De Decent. Ornat. §. 3. p. 53. I.

Denique haec cognitio artis *ad homines traducenda* quasi et applicanda est, ne sterilis esse videatur. In quo demum vera medici vis et doctrina cernitur, quippe non cuius datum est, naturae mysteria reuelare, morbos, in DEMOCRITI quasi puto reconditos, protrahere, eorumque vehementiam infringere, bonam valetudinem reuocare posse. Quo in negotio perdifficili atque perarduo cum saepe fallantur medici peritissimi, multo magis prouidendum est tyronibus, ne sine doctrina et ingenio ad artis usum accendant, et experimenta per mortes egisse existimentur. Nam fortuna sine his nulla est, et verissima etiamnum PLATONIS \*) interrogatiuncula: *Quae actio bona bonum medicum facit? Nonne eruditio?*

## §. III.

Proinde cogitanti mihi haec, quae adhuc commemoranda duxi, submirari subit, quid sit, quod plurimi medicorum obtrectatores fortunam ab litteris seiungi diuillique posse iacentent. Ut enim iureconsultus bonus nemo esse potest, nisi qui, vbi res forensis agitur, leges et edicta principum perspecta habet ac rite adhibet; mercator nemo, nisi qui artem mercium emendarum vendendarumque callet; ita etiam medicus fortunatus tunc demum habendus appellandusque erit, qui artem medicinalem intime nouit, varias morborum formas, latbras, insidias, probe intelligit, nihil timet, vbi ceteri trepidant atque desperant; nam hostem cognitum quis timeat? Quare nec mirum est, apud veteres HIPPOCRATEM, CAELIVM AVRELIA-  
NVM, GALENV M, ALEXANDRVM TRALLIANVM rel. nostra  
B vero

\*) In Protagora, ni fallor.

vero aetate WERLHOFIVM, BRENDELIVM, HOFMANNVM, PRINGLIVM, SIMSIVM, STOERCKIVM cet. et ob scientiam multiplicem magnos medicos exstissee, et, fortuna duce, artem suam dextre exercuisse. Hos artis antistites et coryphaeos duces sequi, et, quoad eius fieri potest, imitando adsequi, vera laus est. Ceteros vero, qui sine litteris et illotis, quod aiunt, manibus artem tractare vel crudis studiis contra morborum vim contendere gestiunt, quia homines ridiculi sunt, et bonum euentum exspectant, vbi ignorant ea, quibus accersitur, fato suo relinquendos et, tamquam medicinae prostitula, amandandos putamus. Etenim *medicina omnium artium praeclarissima* est, auctore *HIPPOCRATE* \*): Verum propter ignorantiam eorum, qui *cam* exercent, et ob vulgi ruditatem, quod tales pro medicis iudicat et habet, iam eo res deuenit, *vt omnium artium longe vilissima censeatur*. Quare non male *SENECA*: *Infeliciter aegrotat, cui plus periculi a medico, quam a morbo.*

## §. V.

Quam fortunam etsi nemo adsequitur, nisi qui disciplinas medicas cognitas perspectasque habet, negare tamen non ausim, medici boni multum interesse, *vt res externae scientiae dexteritatique consentiant*. Nam quae fortuna sine his dici cogitariue potest, praesertim cum *spes interdum frustratur, et moritur aliquis, de quo medicus securus primo fuit?* At vbi conspirant, nonne salus aegri certissime speranda est? In his (puto) eminent primum, *vt aeger viribus sit, nisi integris,* (id

\*) De Leg. §. 1, p. 40.

(id quod propter valetudinem velle nefas est): certe iis, quae sufficient ad periculi vim abigendam. Praestat enim has vide ri nimias, quam prostratas: Illas varia medendi via et ratione imminuere possumus, has difficilime medicina erigere ac sustentare. Deinde non minima fortunae pars est, *in tempore vocari medicum, quia, ut recte poeta \**),

*Veteri post obruta morbo*

*Corpora, paeonias nec quicquam admoueris herbas;*

*Vlceræ possessis alte suffusa medullis,*

*Non leuiore manu, ferro sanantur et igni,*

*Ne coëat frustra mox eruptura cicatrix.*

*Ad viuum penetrant flammae, quo funditus humor*

*Desuat, et vacuis corrupto sanguine venis*

*Exundet fons ille mali, truncatur et artus,*

*Vt liceat reliquis securum degere membris.*

Nam naturae quasi lege sic constitutum esse videtur, ut, nisi anguem in herba iugulemus, magna cognitione ac opera opus sit ad tetram morborum cateruam debellandam. Multos periisse noui, qui, si medicum maturius accersissent, salui atque incolumes euasissent. Post requiritur, ut aeger non speret solum, verum etiam *confidat*, \*\*) fore, ut is, cui salutis suæ curam concredidit, per artis medicinalis ministeria omnem vim vitae illatam depellat. Attamen equidem aegros malim, quibus illud ARISTOTELIS \*\*\*) in ore est, *ne me cures vel vt bubulum, vel vt fossorem; Sed prius caussam edissere.* Sic enim facili me persuasione morigerum reddideris, quam

B 2

qui

\*) CLAVDIAN. In Eutrop. L. II. II. sequ.

\*\*) conf. IO. FRID. DE PRE Diff. de confidentia in medicum, Erf. 1720.

\*\*\*) AP. AELIAN, Var. Hist. IX. 23. p. 171, ed. SCHEFF.

qui temere fidunt. Illi ob persuasionem facile sanantur, reliquis, quia huc illuc vagantur, et cuius se medicum professo credunt, non item. Quisquis vero et hominum mores nouit, et perturbationum animi vim, vel me non monente, intelliget, quantum hoc monitum valeat ad pristinam valetudinem redintegrandam. In quo (fatebor enim) falluntur haud raro aegri, quia, quibus notis medicus verus a spurio internosci debeat, ignorant, et hominem quemuis, e biuio et tabernis progressum, Aesculapium esse putant, quem potius simiam appelles; interim falsis his ducibus dum credunt, minus forte periclitantur, quam qui medicum sibi infensum vel quouis malorum genere affectum vocari iubent. Etsi enim religioni mihi duco, cum auctore HIPPOCRATICO\*) dicere, fas mibi non est, barbaros homines a morbis liberare, qui hostes sunt Graecorum; tamen malim aeger medicum amicum vocet, quam inimicum. Neuter adspectum facile ferre potest, nec is, qui iniuria affecit, nec qui affectus est. Ille, futurorum nescius, vnaque in mortis limite positus, et de vita metuit, et hostis conspectum veretur ob iniuria illatae memoriam; hic vero, quem horrida mortis imago non terret, non aegri eiulatus, quia homo est, et humani nihil a se alienum esse putat, vel inuitus sub ingressu ad talem aegrum motus animi persentiscitur, perturbatur, haeret, et hinc facile errare ac labi potest. Imo vero per experientiam, optimam rerum magistram, edocti scimus, aegros, quos animi aegritudo tenet, non facile seruari, ideoque medici est prouidere, ne, dum prodesse debet, obfuisse perhibeat. Quare ubi

plures

\*) Epist. p. 300. T. II. conf. RABE Diss. de Hipp. barbaris operamine-gante. Lips. 1722.

plures in vrbe sunt medici, hos adeudos putem; Sin minus, tunc demum satius est, pectore bene munito accedere, quam ciuem ob inimicitias temere deserere vel conclamatum relinquare. Tunc *ego amicis incundus* \*), *inimicis mitis et facilis, exorabor ante, quam roger, honestis precibus occurram.* Quarto fieri non potest, ut quis euadat, nisi imperanti medico morem gerat. Id quod eo magis facturum censeo, quo perspectius habet, huic inesse miram doctrinae ingenique vim, eaque omnia artis praesidia, quibus salus hominum potest et conseruari integra, et amissa restitui. Quod dum facit, nullo modo audiet pestilens illud et perditissimum hominum genus, qui absentes epistoliis in metum ac terrorem coniiciunt, praesentes sedulo inter conuiuandum, potandum et saltandum monent, ne cui medico credant, qui sibi displicet i. e. non adulatur, non vagos plebeculae rumusclos aucupatur, non, nisi risu excipit magistelli machinas fraudesque pias, quae quia sub specie religionis fiunt, pessimae censendae sunt, rel. Neque vero ferendi aegri sunt, qui cum medicis de cibo, potu, medicamentis, paciscuntur, quasi quaeratur \*\*), *quid medico liceat, non, quid aegro salutare sit.* His demum praesidiis, fortunam iuuantibus, ubi superaccedunt opes, ad comparanda *medicamenta bona*, quae vel magni constant, eaque copia exhibenda, quam morbi conditio requirit, dubitandum nullo modo est, salutem aegri, modo reliqua consentiant, desperandam non esse. Nam sub hac rerum externarum conspiratione medicum doctum fore longe fortunatissimum, quis est, qui neget?

B. 3

§. VI.

\*) SENECA. De Vit. Beat. C. 20. p. 359. I. 109.

\*\*) SIC CELS. De Medic. II. 16. p. 92.

## §. VI.

Fac vero, sine his aegrum iam conclamatum e mortis faucibus eripi salutique docta arte reddi, nonne hic demum medicus fortunatus dicendus habendusque erit? Etsi enim, ut praecitate CELSVS \*), est prudentis hominis, primum, eum, qui seruari non potest, non attingere, nec subire speciem eius, ut occisi, quem sors ipsius interemit: deinde ubi grauis metus, sine certa tamen desperatione, est, indicare necessariis periclitantis, in difficulti rem esse, ne, si victa ars malo fuerit, vel ignorasse, vel fefellisse videatur: tamen quia vita haud raro quasi intus delitescit, et arte resuscitari potest, audiendum est atque conandum, numquid ars, medicina, assiduitas, audacia prudensque temeritas valeant, quia verisimile est, fortasse responsurum id, quod quis experitur. Quid enim ad consolandum aegri animum aptius, quid ad honorem laudemque medici extollendum magis idoneum, quam quos perditos habebant piae matres anxiique pharmacopolae, eos sibi, suis, patriae, solo artis ministerio reddidisse? Tunc, me quidem iudice, satius est, \*) anceps auxilium experiri, quam nullum. Quod qui potest, non euentus casusque exoptat, non adeo eget fortuna adscititia atque volubili, non buccinatorem existimationis cucullatum vel palliatum quaerit, non pharmacopoei vel tonsoris male seduli, nec obstetricis disertae gratiam assentati uncula quadam aucupatur, non denique Ambubaiarum collegia timet: Nam suae ipsius fortunae faber et architectus est. Osores et obtrectatores non curat, quia, quae non intelligunt, nec ex aequo iudicare

\*) De Medic. V. 26. n. 1. p. 283.

\*) CELS. II. 10. p. 79.

care possunt. Ex se solo et scientia pendet, non ex vulgi opinione.

## §. VII.

Neque vero negligenda in medico est *prudentia*, qua quosuis fibi demererit sciat, salua dignitate, et modo se *bilarem et gratiosum* \*), modo *facilem vel durum*, modo *grauem vel comem* cet. praebeat, prouti res et conditio aegri postulant. In quo quia multi delinquunt medici, ecquod mirum, si aut nunquam, aut certe haud facile emergunt? In hoc solo caussalatet, quare multi solent *accersi* \*\*) ad aegros, *prae aliis eligi, ad morbos benigniores vel maligniores curandos vocari, assistere plebi, esse a comitatuprincipum regumque, contemni in iuuentute, emerisse in senio, vicissim amari ab omnibus in prima aetate, in patria suppressi, alibi manibus interpositis in altum extolli, vocari in declinatione morbi, quod multos euexit in altitudinem, vel ubi mortis iam imminet metus, quod multorum animos vrit, multorum conscientias etiam innocentissimas turbat, in magna versari fama, cum sis mediocriter doctus, opinione hominum deprimi, cum sis doctissimus cet.* Quae dum sunt, fere moribus medici, perraro doctrinae, accepta ferenda sunt, quoniam ea est hominum natura et indoles, ut malint medicos tempori inseruientes, quam iubentes i. e. praecepta sua rogando quasi minuentes ac delinquentes, medicamenta, quoad eius fieri, potest, varia vario aegrorum satori accommodantes, raro vel crebro inuisentes, prouti amicorum fert opinio, tacenda,

\*) conf. HIPP. Dec. Ornac. §. I. p. 52. et Praecept. §. 9. p. 66.

\*\*) V. SEMPRON. GRACCH. in Med. hui, seculi III. p. 321.

da, ut opus est, et iusiurandum Hippocrateum requirit, non temere reuelantes, femellarum ingenio blandientes, neque vero sub specie artis, more VECTII VALENTIS et EVDEMI, debacchantes rel. In quo multa quidem (fateor) insunt, quae, salua dignitate ac auctoritate medici, fieri nec possunt, nec debent; at siunt tamen quotidie, et multis famam opesque pariunt, et incautos ad similia impellunt. Quos ideo monendos putamus, ne temere in haec exempla intueantur; Res enim periculi contemtusque plena est, quia quae istis artibus fama nomenque paratur, diu manere et consistere non potest; diutius, quae menti, doctrinae, moribus, debetur. His omnes omnino homines sibi deuincire posse, vera sempiternaque medici prudentis laus esto. Sed de his paullo post pluribus.

## §. VIII.

Quare cum multum intersit nosse, quibus praefidiis prudentia medici boni innitatur, visum est potiora in medium proferre, ut intelligat optimus quisque, quid sperare ac poscere debeat, contra quid fugere ac abhorrire. Illa medicum decent, haec dedecent.

## §. VIII.

DEVUM \*), vniuersi huius architectum et seruatorem, bonorumque omnium auctorem, pie venerari ac colere debet medicus, quia eius sub auspiciis medicinam salutiferam sperare

\* ) HIPP. L. Dec. Ornat. §. 6. p. 55. I.

re licet, et hac sola via eorum \*\*) calumnias refellere, qui medicis religionem inesse negant. Caussas huius maledicti omnes omnino iam recensere non lubet, siue ab mala persuasione illud oriatur, qua multi se religiosos censem, vbi certis diebus statoque tempore sacris intersunt, medicos vero, quia non idem faciunt, et religionem volunt, non eius simula-  
cra, superstitionem eiusque amantes cane peius ac angue fu-  
giunt, negotiis distenti saepe ab officio auocantur, cuius au-  
rem facilem praebere recusant, et piaculo ducunt ex consue-  
tudine sacra facere, atheos, naturalistas, separatistas rel. no-  
minant; siue debeatur intempestiuae quorundam superbiae,  
qui vbi se sperni sentiunt, religionis auctoritatem adhibent,  
vt habeant, qua illatam iniuriam vlcisci possint; siue tandem  
a peruersa iudicandi licentia profiscatur, qua sibi et aliis  
persuadere cupiunt, non, nisi eos medicos felices fortunatos-  
que futuros, {qui christiani nomine, non resunt, et se tales  
praestant, quales boni illi viri omnes esse volunt. His aliis-  
que nugis attendere nefas puto. Nam etsi facile largiar, re-  
ligionem christianorum, vt praestantior ceteris est et aptissi-  
ma ad bona praesentia ac futura reportanda, ita multum saluti  
ciuium aegrorum prospicere posse; tamen quia certum mihi  
est atque persuasum, in medicina proxime spectandam esse  
doctrinam ingeniique vim, non miraculosam diuinitatis po-  
testatem, mirari profecto subit, quid sit, quod multi etiam-  
num ciuibus autores suasoresque sint, vt sibi medicum po-

C

tissi-

\*\*) V. nostr. *Gedancken von der Arzn. und den Aerzten* c. 15. p. 625.  
sequ. EL. FR. HEISTERI *Apologia pro medicis*, Amst. 1736. et praec-  
ceteris Ill. TRILLERVS in *praeclaro libro; Apologia pro HIPPOCRA-*  
*TE falso atheismi accusato*, Rudolf. 1719.

tissimum eligant, qui, et si opificium atque saponem redolet, et ob ignorantiam niger est, tamen se pium simulat; quasi vero quis P. CORNELIVM SCIPIONEM \*) imitatus, sub specie pietatis, rigida et obstipa ceruice, adducto vultu et fronte caperata, supercilio contracto, gressu et sermone tardo, alios impune fallere, et, quod non habet, hac fraude usus dare possit, hac laude ementita, falsa errorisque plena aegros curare. Memini enim me videre tales medicos, qui sibi verbosis religionis strophis famam acquirebant, nec uilla artis prudentia, sed stupore vulgi facti erant nobiles; In quos cum curatius inquirerem, eos inueni omnium omnino impostorum pessimos, qui crumenas emungebant, sanitatem non restituebant; Contra memini, alios, qui nec praeiudiciorum vanitati, nec superstitioni concedebant, dextre et ex artis praecepsis, sine sacrorum nominum numinisque contemtu, aegros resuscitasse. Quod si verum est, felicem fore medicum, christianus talis sit, nec ne, modo artem, et quae artis sunt, bene sciat atque loco apto adhibeat, consequens est et consentaneum, ut tandem aliquando desinamus sic religionem profanare, et istis e plebe medicis credere, qui *specie salutari irrepunt, veluti altiorem sanctioremque medicinam pollicentes, et blandissimis desideratissimisque promissis addunt vires religionis, ad quas maxime etiamnum caligat humanum genus \*\*.* Sunt enim et isti homines omnium longe vilissimi, et ii, qui tales rudi plebeculae impense commendare audent, ridiculi meri-

\*) V. LIV. Hist. xxvi. 18. p. 25. seq. T. II. ed. Ern.

\*\*) Sic praeclare PLIN. Hist. Nat. xxx, i. p. 537. seq. ed. Basil.

meritorum aestimatores. Nam minus crederent \*), quae ad salutem suam pertinent, si inteligerent.

## §. X.

Alterum, quod in medico defideramus, est, esse eum *moribus integris*, quoad eius per humanae mentis imbecillitatem fieri potest. Nihil enim morum modestia commendabilius, nihil antiquius, esse iis debet, qui medicinam faciunt, quippe quotidie licet homines cuiusque generis, aetatis, sexus, ordinis, visere, inspicere, quid intus agatur, curare corporum vitia et morbos earum partium, quas natura occulti et ab omnium oculis remoueri voluit, ideoque et licentius, ac fas est, agere. Quam facilis male morato medico peccandi occasio! Qua de re bene Cous Senex \*\*): *Maxime ad opinionem ac auctoritatem comparandam conductit, bonis ac honestis moribus praeditum esse.* Nam cum talis fuerit, omnibus venerandus ac humanus iudicabitur. Prae ceteris vero videat, ne qua cui fiat iniuria, ne scelerum multitudine notatus atque insignis sit, nec aleatorum et nepotum collega, ne se deliciis et cupediis soluat, et delicatiorem cibum appetat, mille condituras, quibus auiditas excitetur, boletos, garum, ostrea, aestiuam niuem cet., nec vino indulgeat, quo arterias cadentes fulcire licet, non distendere, et omnium minime, vaga venere delectetur, vel alienas mulierculas concupiscat, quoniam turpe est medico, si qui ei maritus bonusue vir hanc maculam sempiternam inurere possit. Et

C 2

enim

\*) Ib. xxix. 1. p. 525.

\*\*) L. De Medico §. 1. p. 44.

enim non exigua commercia \*) aegris eum medico sunt. Se-  
ipso medicis subditos faciunt, et omni hora uxoribus, virgini-  
bus et opibus, maximi pretii illi occurrunt. Continenter  
igitur ad omnia haec se habere debet. Quamobrem cum legi-  
bus constitutum sit, vt, si quis virginem vel feminam nolen-  
tem et inuitam vi comprimat, poenam luat grauissimam, quan-  
tam demum putatis poenam medicos manere debere, qui sub  
specie artis et amicitiae fallunt, et matronarum pudicitiam  
prosternere student, Lucretias in Messalinas transformare?  
Tales medicos litteratos nemo prudens curat, sed fugit; la-  
tentem in herba anguem quisque timet, et vxor ac filia vt  
viuant innocuae atque intemeratae, praeoptat. Nam me-  
dicos solos, quibus tantum hominem occidisse impunitas sum-  
ma est \*\*), hoc impune facere posse, et sub priuilegiis suis  
comprehendere, quis est, qui credat? Accedat et illud necesse  
est, vt verecundiam et re, et verbis sectentur, praesertim si de  
naturalibus sermo est, atque dum foediora et indecora verba  
adhibenda sunt, simul et pudorem, et artis praecepta seruent.

## §. XI.

Cogitanti mihi praeter haec et memoria CICERONIS et  
QVINCTIELIANI \*\*\*) decretum repetenti, oratorem perfectum  
esse non posse, nisi virum bonum, non male egisse videbor,  
si hoc ipsum de medico censem. Siue enim species vitae  
genus, quod ab infinito labore non abhorret; siue artis for-  
mam et habitum, quae eum infirmorum lectulis quasi affi-

xum

\*) HIPP. L. c. p. 45.

\*\*) FLIN. l. et p. cit.

\*\*\*) Institut. Orat. I. in Prooem. p. m. 3.

xum tenet; siue quotidianam consuetudinem et familiaritatem, quae utriusque et medico, et aegro, intercedat necesse est; siue denique crebram nocendi fallendique opportunitatem, verus perfectusque medicus qui dici cogitariue potest, nisi vir bonus? Quae animorum corporumque securitas sperari, qui beneficiorum abhorrens usus exspectari, nisi talis mentis conformatio, aequi amor et omnis rectae honestaeque vitae ratio praefit? Sine his mehercle nusquam tuta fides, nusquam secura medicina est. Quam animi propensionem, qua cuius bene volumus et operam damus, ut sine ambitione verum cum scrutemur, tum sequamur, ubi medico inesse senseris, omnem abiice metum; Salua res et integra vita est, modo reliqua non desint. Nam cum in hac arte \*) medicinali sola euenit, ut cuicunque, medicum se professo, statim creditur, cum sit periculum in nullo mendacio maius; nulla praeterea lex est, quae puniat in scitiam capitalem, (inuere cundiam, morum immodestiam, auri sacram famem rel.) nullum exemplum vindictae; tandem multi discunt periculis ciuium, et experimenta per mortes agunt, hoc unum in votis esse debet, ut ii, quibus ex principum voluntate ac auctoritate licet doctoris nomen honoresque conferre, non, nisi merenti faueant, bene memores clausulae principalis; *Conscientias vestras oneramus!* et quantius pretii rem esse vitam salutemque hominum existiment. In ceteris enim doctrinis, si qui ignari artis sunt, quam profitentur, vel mentis improbae, opus non adeo plenum periculosae aleae est. Nam aut breui se tales esse probant, quales prudentior quisque dudum

C 3

prae-

\*) PLIN. H. et<sup>r</sup> p. cit. conf. HYP. De Leg. §. I. 40. sequ. L.

praesenserat, et negliguntur illico, aut certe opibus facile perituri iterumque comparandis insidiantur; a medicis autem indoctis, quia *fama* \*) *quidem et nomine multi, re autem et opere valde pauci* sunt, si quid delinquitur vel ob inscienciam, vel negligentiam, vel quaevis audendi licentiam, sanitas hominum labefactatur, vita tollitur, ciuis, pater, maritus, vxor, iugulantur, liberique moerentes ac lugentes in miserrimum rerum statum coniiciuntur. Quod ne fiat identidem, prouidendum est, vt, quoad eius licet, improbos talium medicorum conatus inhibeamus, et, nisi eradicare funditus et e societate tollere eos possimus, certe magno animo spernamus, ideoque si qui iis sensus honesti bonique reliquo est, cum virtute in amicitiam redire cogamus. Medico vero bono et docto nihil praestabilius, nihil optabilius orbi dari potuisse existimo. Is enim nunquam immemor est illius apud HIPPOCRATEM \*\*) moniti: Σωζε, βοηθει, θεραπευτον. *Serua, iuua, cura.*

### §. XII.

Nemo vero vir probus esse potest, nisi qui vbiuis *bona fide* agit, nihilque a se vel expeti, vel committi patitur, quod religioni et bene actae vitae conscientiae aduersum esse possit. Quo in loco habendum prae ceteris censeo, vt, si cuius curam in se receperit, nihil habeat reliqui, quod non in se ipso et amicis experiretur, nihil temere vel imprudenter agat, ne quem perdidisse videatur, qui desperandus non erat; nulla medi-

\*) HIPP. De Leg. §. I. p. 41.

\*\*) In Ep. ad DAMAGET. p. 913. seq. T. II.

medicamenta adhibeat, nisi quae bonae notae viribusque non expertia, item naturae morbi ac aegroti consentanea; reliqua vero, i quae usum et experientiam, doctrinam magnam et cautionem haud leuem desiderant, non sine dilectu et prudentia; denique a *venenis*, et *abortiis* cum maxime, abstineat, partim quia nullum scelus tam foedum et inhumanum est, quam teneros foetus conuellere, et nondum natis dira venena dare, partim quia religione et iureiurando **HIPPONCRATIS**, quo plurimis in Germaniae academiis etiamnum adstringuntur recens creati doctores, perfecte repugnat, et famae maculam aeternam adspergit. *Ceterum quod ad aegros sanandos pertinet, inquit diuinus senex \*) diaetam ipsis constituant pro facultate et iudicio meo commodam, omneque detrimentum et iniuriam ab eis prohibebo. Neque vero nullius preces apud me adeo validae fuerint, ut cuiquam venenum sim propinaturus, neque etiam ad hanc rem consilium dabo. Similiter autem neque mulieri talum vuluae subdititium ad corrumpendum conceptum vel foetum dabo, sed sancte vitam et artem meam conferuelo.* Iam vero non attinet disputare, vtrum dentur eiusmodi medicamenta vere abortiua, nec ne: Nam cum hoc cogitare scelus sit, quo nullum aliud maius, tum vel maxime crimen est capitale, si a medico eo consilio dentur, vt foetus in utero necatus pereat. Qui ciuem occidit, siue nascendum, siue natum, homicida esto, et si hoc temerario ausu committit medicus, quem leges custodem tutoremque publicae sanitatis et vitae esse iusserunt, tunc, me quidem iudice, omnium maleficorum maleficientissimus est.

Hinc

\*) Ius iur. §. 2. p. 43.

Hinc praefstat non dare talia medicamenta, et vel ridiculus quibusdam ac rerum bonarum scilicet nescius videri, quam piaculum mereri, et in alieni facinoris societatem descendere. Satius est viro probo, vitam conseruasse, quam eripuisse, et malim medicum quemcunque *aequalem ac parem verbis vitam agere atque ita viuere, ut omnis ratio verbis consonet.* Praeter haec fidum medicum oportet neque recentiores viros\*) *in his fraudare, quae vel repererunt, vel recte secuti sunt, et tamen ea, quae apud antiquiores aliquos posita sunt, auctoribus suis reddere.*

## §. XIII.

Porro summa medici laus est et artis commendatio, *tacenda conticuisse.* Quae virtus ut in omni vita omnique vita genere pernecessaria est, ad animi tranquillitatem, et multum valet ad studia suo optimo cuique probanda et commendanda, quia in hac rerum vniuersitate multa eueniunt, quae etsi turpia vel flagitiosa per se non sunt, tamen aperte ac palam fieri vel dici mea interest, ne in reprehensionem vulgi incurram, ita maximi habendum censeo medicum *tacentem* quem rerum necessitas malorumque grauitas saepenumero voluntatis interpretem, actionum testem, rerum obeundarum aetorem et comitem, denique amicum fidum esse volunt. Haec etiam, ut fere omnia, perbene diuinus **HIPPOTRATES** \*\*): *Quaecunque inter curandum video aut audiero, immo etiam ad medicandum non adhibitus, in communi hominum vita cognouero, ea, siquidem efferre non contulerit, tacebo,*

\*) Sic. CELS. De Medic. II. 14. p. 88.

\*\*) L. cit. §. 3. p. 43.

tacebo, et, tanquam arcana, apud me continebo. Hoc vero iurisurandi vinculum, quo nullum aliud ad adstringendam fidem arctius esse maiores voluerunt, soli non potest, nisi legum vis et auctoritas, (id quod perraro incidit) vel male sana aegrorum mens et impudentia, vel proprium medici nomen ac fama, publicam morbi confessionem desiderant: omnium vero *minime loquacem* eum esse oportet, si qua labes grauis hominem tenet, v. c. epilepsia, aut in naturalibus vel reliquo corpore vitium tetur et adspectu vel opinione foedum insidet v. c. nymphomania, fluor albus, 'gorrhœa, lues venera cet. Quae mala, quia ex opinione hominum periculosissima et turpissima habentur, aegri vero famam proscindunt, et maleuolorum conuicis exponunt, intelligitur, medicum haec corporis vitia habere debere tacite, nec plenum rimarum esse, et hac atque illac perfluere. Taciturnitas enim mea molesta est nemini, sed commoda aegro; quidni ergo illud faciam, quo omnes omnino homines mihi deuincire ac obligare possim? Quidni celanda celem, et curiosius, ac fas et opus est, in labem alienam inquirenti fucum ac verba dem, morbum alium alii quasi surrogando? Quidni ego fluorem album malignum benignum, scabiem et phthisin venereum simpliciter appellem, tumidas podicis maficas et condylomata vulvae pro acrimonia cet. venditem? Hac equidem via et ratione femellas delicatulas iuuenesque animum despondentes, vbi post voluptatem talia vitia efflorescere viderant, persanasse me candidus profiteor, et saepenumero dum apud aegros de vero morbi nomine et causa filui, ne qua in re aut eos offendisse, aut iis, qui ante me curam

D

habue-

habuerant, nocere voluisse putarer, mercurium ceteraque medicamenta, quae e re erant, bono cum commodo exhibui. Hinc satis vere NASO \*):

*Eximia est virtus praestare silentia rebus:  
quod ut nusquam obliuiscantur medici, eaque re et famae  
aegrorum, et saluti suae prospiciant, optabile est.*

§. XIV.

Sit vero etiam medicus *comis*, in omni sermone *affabilis* et *iucundus*, siue ut cum HIPPOCRATE\*\*) loquar, figuram faciei habeat meditabundam ac subtristem, non tamen amarulente. *Contumax enim esse videbitur et homines odio habens.* *Qui vero in risum exsolitus est, ac nimium bilaris, onerosus iudicatur.* Aegri enim, quia misere afflictantur et morbi vim cruciatusque experiuntur, animum hastamque deponunt, senibus haud raro morosiores et bibonibus intemperantiores sunt, omnia timent, nusquam salutem integrum esse putant; Hos comiter compellare, non increpare, blanditer consolari et erigere, non contumelias miserias augere, tandem suadendo, monendo, hortando, id, quod factu opus est, exigere: his spem atque fiduciam indere, aerumnas animi atque molestias corporis tollere, certe imminuere, *futura*, quoad eius fieri potest, celare decet, ne ob imprudentiam medici omnia in peius ruant et fatum acceleretur. Quo solo et medici probi ac gratiosi officio satisfit, et dignitati artis consulitur. Interea rerum videndum est medico, ne quid nimis, neque *cum imperitis multa fabuletur, sed necessaria \*\*\*).* Multos enim

noui,

\*) De Arte Amand. II. v. 603.

\*\*) L. De Med. §. I. p. 45.

\*\*\*) Hipp. L. Dec. Ornat. §. 7, p. 56.

noui, qui dum aegris eorumque amicis placere vellent, tempus *confabulando* triuerunt, more balneatorum et capillaturaे structorum fabulas urbis hinc inde deportarunt, et ad seruilia artis ministeria se paratissimos ostenderunt. Hos vero, modo ingenia et mores hominum noui, vel ii ipsi, quibus inferuire cupiunt, iure suo spernunt, et nauci pendunt. Qua de re cum modus in rebus sit, media via incedere optimum est. Officiosus in \*) homines medicus sit, et aliqua cum mansuetudine ac gratia quosque sibi obligare studeat, sicubi sibi bene esse volunt, medentisque operam et studium rite aestimare sciunt: Sin minus, ab officio abstinere praefstat, ne forte verissimum dicere cogatur illud PHAEDRI \*):

*Qui pretium meriti ab improbis desiderat,  
Bis peccat; primum quoniam indignos adiuuat,  
Impune abire deinde quia iam non potest.*

Sit medicus *impiger* atque *indefensus*, si operam non irritam et aegros obsequiosos fore praeuideat. Sin vero alio tempore eos tam absurdos ac stultos deprehenderit, vt solo medici *adspicere* curari se posse putent, medicamentis non opus esse, eaque vel scriniis dant, non ventri, vel formulas et iustum usum negligunt, fine mora *discedendum* est, ne pompam funeris seruiliter ducere velle videaris, et mortui laudes vel e suggestu sacro speciosiores reddere.

## D 2

## §. XV.

\*) V. IAC. THOMASII Disp. De med. facultate, quatenus gratiosa, Schneeb. 1734. et IO. PAUL. FINCKE, Disquis. cur ordo medicorum gratiosus dicatur, Lubec. 1741.

\*\*) Fab. 8. L. I. p. m. 5,

## §. XV.

Ex his sequitur, vt medicus sciat in tempore esse *misericors* atque *durus*. Crimini vertitur duci, qui dum pugnandum est acriter, cunctando rem perdit, quidni jet medico? Etenim in arte facienda multa incident, quae animum ad quasuis res compositum et obfirmatum requirunt, vbi non trepidandum, sed agendum, non cogitandum, sed obluctandum, non parcendum, sed laedendum acribus, cultro, flagellis, virgis, est, si aegrum seruari velis. Tunc, bene monente CELSO \*), medicus similiter, vt chirurgus, sit *animo intrepidus, immisericors, sic, vt sanari velit eum, quem accepit, non ut clamore eius motus, vel magis, quam res desiderat, properet, vel minus, quam necesse est, fecerit, sed perinde faciat omnia, ac si nullus ex vagitibus alterius affectus oriatur*. Pessima, vt mihi videtur, misericordia est, si qui voluntati aegri et mollitiei temere indulget, cutim lacerare vel membra incidere nefas et carnificinam credit, sanguini parcit, quia facile deliquium animae sequitur, a vesicantibus et sanguismissis abhorret, quia hinc magna nervis vis et sensus ingratius infertur, medicamenta terrea, quibus ne leuissima quidem salium vel extracti amari portio immista est, vt gulæ blandiatur, impudenter exhibit et pleno ore commendat, cuius morborum symptomati, dolori capititis, ardori, frigori, siti rel. mederi gestit, quia is, qui aegrotat, desiderat, nulla mali primarii ratione habita rel. Talem equidem virum medi-

\*) De Medic. VII. Praef. p. 406. ed. Lips. conf. STENTZEL Diss. de medico minus duro omnium durissimo, Viteb. 1745. et CL. PLAZ de medico audace, Lips. 1766.

medicum bonum et probum esse nego et pernego, quia id, quod factu opus est, negligit, nihil detrahit, ubi detrahendum erat; in summa, spectator est, non actor. Contra nec quorumdam licentiam laudare ausim, qui, dum quiete opus est, omnia turbant ac miscent, secant, vrunt, vexant, dolore, vigiliis, inedia, fame, vomitu, pharmacis et id genus aliis medicinis homines miseros cruciant, macerant, enecant, eoque crudelitatis genere mire delectant. Quasi vero haec demum vera et efficax medicina sit! Evidem laudarim eum, qui sub auctore **HIPPOTRATE**\*) fide magis, quam duritie medetur, et loco commodo, et medicamentis aptis vim cum facere, tum frangere nouit. Hanc enim viam et rationem prudenter ingressus iuuabit multos, violabit neminem.

## §. XVI.

A comicis prae ceteris ridentur, qui omnia ad *utilitatem* referunt, ad conscientiam aut parum, aut nihil. Neque vero iniuria. Nam ea conditione nati procreatique sumus, ut societatem vitae et officiorum, qua nihil ad salutem maius, nihil ad suavitatem accommodatius, cum aliis coeamus, neque fictis sermonibus, falsis criminibus sordidaque avaritia, efficiamus, ut aut in solitudinem ac silvas discedendum esse videatur, aut omnibus, quoniam ad rem attentiores sumus, risui ac odio exponamur. At vero *natura solitarium nihil amat* \*\*), semperque ad aliquod, tanquam *adminiculum*, an nititur, quod in amicissimo quoque dulcissimum est, hominem-

D 3

que

\*) Praecept. §. 4. p. 62.

\*\*) c i c. de Amict. c. 23.

que sociale animal esse voluit. Quae vero vitae suauitas et socialitas cogitari, quae amicitiae foedera fieri possunt, vbi alter alterum laedere non dubitat, data quavis bona eripiendi occasione? Quae religionis, humanitatis, iurisiurandi, integritatis morum, vis atque potestas in eum futura est, cui odor bonus ex re qualibet est? Hic patriam prodere, iura sacra et ciuilia violare, pudicitiam vxoris et filiae, linguam, manum, calatum, venalem habere, usuras multiplicare, et omnem legum vim eludere non verebitur, modo auri sacram famem exsatiare possit. Quae mentis aegritudo et pestis capitalis ut singulos homines male notat quasique infames reddit, ita vel maxime dedecet *medicum*, quem leges sanitatem publicam conseruare ac restituere iubent, quemque iusurandum Hippocrateum eo adigit, ut diuitem ac pauperem aequa cureret, sineulla spe praemii, et diem se perdidisse dicat, quoties de ciuibus bene mereri non licuit. Sed consideranti mihi medicorum plurimorum mores, perbeati fuisse videntur veteres, quibus Coi senis \*) effatum sacrum erat. *Omnia*, quae ad sapientiam requiruntur, insunt in medicina, argenti contemtus, reuerentia, verecundia, habitus submissus, auctoritas, iudicium, quies, comitas et affabilitas, munditia, doctrina, cognitio ad vitam utilium ac necessiarum purificationum, alienitas a mercimoniiis et superstitione, praeeminentia diuina. Habent enim, quaecunque habent, ad coercendam intemperantiam, infiditiam, auaritiam, concupiscentiam, vapinasque ac impudentiam. Multi habent rempublicam quae-  
stui, nec pedem porta efferunt, nisi prius de mercede con-  
stet.

\*) De Dec. Ornat. §. 5. p. 55.

ster. Quam si propositam oculis cernunt, vilissimo cuique seruiunt, et vel abiectissima ministeria obeunt. Fama est, HELWIGIVM, haud ignobilem quondam apud Vratislauenses medicum, at ex asse respondentem auaro PLAVTINO et SYLVIO professori, visitasse aliquando principem IACOBVM, morbo haud adeo graui aegrum. Ades, quaeso, inquit ille, et hac nocte mecum age vigilias. At medicus hoc deprecari sedulo, et multis docere, se magna aegrorum visendorum multitudine defatigatum ac senem somno, perfugio laborum et sollicitudinum, carere non posse. Quod vbi intelligit princeps, qui hominem intime nouerat, cubiculario innuit, candelabra argentea inferri et medico haesitanti dari iubet. Hic vero tanto operis caelati splendore percussus mollescere coepit, et ad nutum voluntatemque principis se totum conuertit. Arrepto dono: Ego vero faciam, inquit, quae iubes; sed maturato opus est, ut quam ocyssime redeam. Et sic exiit, non curans principis iussum, quo ista munera per ministros domum deferri voluerat. Nam nec principi fidem habendam esse sordidum illud hominum genus existimat. Ecquis vero tales tamque abiectos medicos magni aestimet? His, qui quaestui seruiunt, profecto medicina et animus seruulis est, et quoniam *is maior ex populo* \*) est, libenter amplectuntur ea praecpta, quae sedulitatem uon exigunt. At prudentis bonique medici est, et mercedem iustum legibusque propositam quaerere, sive facultates aegri fieri possit, (cur enim auari numis parcat?) et pauperi gratis adesse, quia *is*, qui nihil habet, nihil dare potest, neque vero ob communia humanitatis ciuitatisque iura negligi et perdi debet. Hinc praecclare monente

\*) V. CELS. III. 4. p. 120.

nente auctore. HIPPOCRATICO \*) nihil debet impellere bonum medicum ad quaerendam suam commoditatem, sed ut magis existimationis rationem habeat. Itaque tunc melius est, ut seruatis exprobret, quam ut letaliter affectos praeconturbet cet. Quare vellem principes saluti vitaeque ciuium taxatione laboris medici et pharmacorum melius consulerent, constituerentque praemio apto *physicos*, qui capite censos gratis curarent. Hoc enim beneficio solo et fraudes praecauevi, et ciues saluos ac incolumes conseruari necesse est.

## §. XVII.

Sed omnium maxime dignitatis auctoritatisque ratio habenda est: qua semel amissa, medicus verus nemo esse potest. Tunc enim medicus iubet; Aegri non obsequuntur: Ordinat; non reuerentur: Minatur; rident, sibilo excipiunt, naso excusso suspendunt: Inuisere amplius recusat; Nauci faciunt, persuasi, eum pocula et praemia velle, non salutem. Quid ergo amplius? Habent medicum eo loco, quo parasitum, cuius assentatio faceta non videretur, nisi coenam condiret, et iocum ludumque se haberi pateretur. Medico vero, quem contemtui habeo, quam fidem et reverentiam adhibebo? Nullam, mehercle, quoniam nihil ab homine desideres vel exspectes, cui omnia sunt venalia vel aequo animo excipienda. Sed placet potiora recensere.

## §. XVIII.

Princeps dignitatis munimentum et tutamentum esto, ut non, nisi *rogatus* medicus veniat. Conuiua enim gratus et commodus fere nemo est, nisi qui inuitatus ad epulas accedit, neque

\*) Praecept. §. 4. p. 62. sequ.

neque medicus placere diu potest, qui sagacissime odoratur, sicut  
vbi quid lucrandum est, et famam ac panem obtestatione  
alienae scientiae vel insinuatione auctoratur. *Beneficium*  
vero \*), quod quibuslibet datur, (et obtruditur) nulli gratum  
est. Reuerentia personae non obstat, si molestus aspectus  
est, quo minus eum temere irruentem procul abesse aeger  
iubeat, et haud raro in medico usu cueniet, quod in mini-  
stris: Qui si quando, vbi quid deliquerunt, monentur a dominis,  
moleste ferant iurgia, et publice profitentur, quaesitos se  
esse sedulo, nec iniussos aduenisse. Tales vero dari medicos,  
qui malint se obtrudere quovis modo et artificio, quam vo-  
cari, constat inter omnes. Sed per paucis aegrorum, nisi  
dubiae sanitatis sunt, hac via secessum commandant, quoniam ob-  
lata beneficia vilescunt, et sub auctore **HIPPOTRATI** \*\*)  
*promptitudo temeraria et facilitas contemnentur, etiam si valde*  
*commoda existant.* Quare monendi sunt medici, praesertim  
iuvenes, ne hisce strophis artibusque illicitis aurum et auram  
popularem captent: Saepe enim more canis apud **PHAE-**  
**DRVM** \*\*\*) amittunt merito proprium, dum alienum appetunt:  
neque vero *crebrius*, ac morbus desiderat, aegros inuisant, ne aut  
lucelli aliquid facere velle videantur, aut iugum seruitii ferre;  
neque tandem *illico*, ac iussi sunt, *aduolent*, nunciosque  
praecurrant; Turpe enim est medico, quanta fieri potest ce-  
leritate, signo dato, ad ministeria concurrere, et magnam de-  
se moueat suspicionem necesse est, se aegros expetere, non  
expeti ab iis velle. Qui tales se gerunt, quales iam commemo-  
ravimus, qui hominum mores et ingenia sint, nesciunt, quia mul-

E

torum

\*)) *SENEC.* De Benef. I. 14. p. 595.

\*\*) L. De Medic. §. 1. p. 44.

\*\*\*) L. I. Fab. 4. p. m. 4.

torum ea est peruersitas, vt, dum aegrotant, aureos montes polliceantur; at vbi euaserunt, beneficij officijque immemo-  
res, hasce minutias aude arripiunt, vt, quod ogganniant,  
habeant. Pauci sunt, qui beneficia non numero, nec pon-  
dere, nec villa, nisi accipientis aestimatione, pendant, et haud  
raro *tutius* \*) est, *quosdam offendere, quam demeruisse.*

## §. XIX.

Altera auctoritatis conseruandae Iex esto, vt *clam* me-  
dico priori te induci ad aegrum ne patiaris: Hoc enim ho-  
minis mali notatique signum est ac scelus: neque *speculato-  
res* adhibeas, qui hinc inde, tanquam excubiae dispositae, dis-  
currant et diligenter attendant, numquid accidat, quod possint  
alteri vertere vitio: Hoc enim contemptum parit: neque tan-  
dem vbi \*\*) *in subsidium* priori medico voceris, animo laeden-  
di, obiurgandi, contra dicendi, risum mouendi, viam et ra-  
tionem medendi, quam securus est, carpendi rel. accedas, sed  
vt ei, qui inuitari iussit, bona fide prosis, ideoque, seposito  
omni partium contentionisque studio, verum dicas et argu-  
mentis munias, auctoritati veterani nihil detrahas, nisi sit  
iusto arrogantior, iunioremque prae se despiciatur habeat,  
quasi in barba, canis et rugis sola medici praestantis vis insit;  
ex artis medicinalis placitis omnia peragas, non ex praeiu-  
dicatae opinionis vanitate; uno verbo, ea, quae olim adhi-  
buisse ac suafuisse non poenitebit: Nam, vt *praeclare CEL-  
SVS*, \*\*\* *in medicina, etiam vbi perpetuum est, quod fieri  
debet,*

\*\*) SENECA. De Benef. II. 24. p. 416.

\*) HIPP. Praecept. §. 7. p. 64.

\*\*\*) De Medic. VII. 12. N. 4. p. 446.

*debet, non tamen perpetuum est id, quod sequi conuenit.* Quae si audiuntur ac probantur, praesta te bonum virum medicumque propositi tenacem; Sin minus, aut te contine, aut, quod malim, ne accede amplius, ne artem ipsam aliorum risui exponas. Vitandae enim sunt illae circa aegros \*) miserae sententiarum concertationes, nullo idem censente, ne videatur accessio alterius, et omnis danda est opera, ne verissima sit illa infelicis monumenti inscriptio \*\*), turba quemquam medicorum perisse, et MARTIALIS \*\*\*) dicterium audiendum:

*Quid tibi cum medicis? Dimitte Machaonas omnes.*

Rara est (turpe dictu!) medicorum concordia, verum in eos illud valet HESIODVM \*\*\*\*):

*Figulus figulo succenset, et fabro faber,  
Et mendicus mendico inuidet, cantorque cantori,*  
idque non sit per artem conie&turalem, ut multis videtur, sed per medicorum mores et ingenia, qui sibi, non aliis, bene cupiunt. Quae vero mala, contentiones, digladiationes acres, turpia capillamenti defluvia, vox rauca, apoplexiae metus, inuidiae, odia, calumniae, tanquam e fonte peremni, dimanarint et etiamnum dimanent, dici vix potest: vnde summa medicinae ipsi iniusta nota est. Neque mirum est, medicos, dum talia faciunt, qualia e plebe quisque, ridiculos videri, et sperni, et saepe illud Horatianum \*) audiri:

*Odi profanum vulgus et arceo.*

E 2

Is

\*) PLIN. XXIX. I. p. 525.

\*\*) Ibid.

\*\*\*) Epigr. 16. L. II.

\*\*\*\*) v. Oper. et Dies L. I. v. 25. sequ.

\*) Carm. L. III. Od. I. v. I.

Is enim, qui prudens et fanae mentis est, non medicum disertum, sed agentem \*) desiderat.

## §. XX.

Turpe etiam est medico, tum eorum, qui et bene valent, et suae spontis sunt, tum vel maxime aegrorum, benevolentiam blanditiis et *assentationibus* colligere, et quouis modo se in consuetudinem ac usum immergere, *molliter* \*\*) et *blande aegris corporibus*, *non, qua optimum et celerrimum est, mederi, sed qua licet*; se gnathonum similem ostendere, et ad cuiusvis hominis, loco, fortuna, fama, superioris, non modo sensum ac voluntatem, sed etiam vultum atque nutum conuerti. Haec enim hominem abiecta mentis, leuem et fallacem, nec non lucelli studiosum prodit, et indignum vitae necisque imperatore est, seruire aliorum cupiditatibus, ut, quod adulacione ac blanditia eripere possit, facilius consequatur. Non opus tanto molimine est. *Parabile est, quod natura desiderat* \*\*\*) et appositum; *ad superuacua sudatur. — Ad manum est, quod satis est.* Estne ergo eundum medico hac via regia, quam plurimi ingrediuntur? Non putarim. Et enim non adulando, sed faciendo et bene promerendo, sed doctrinam proferendo, sed usum et experientiam manifestando, ad gloriam nominis sempiternam enitendum est. Sapiens vero et sibi constans medicus non curat *fauorem popularem*, \*\*\*\*), qui malis artibus quaeritur, quia se similem illis faciat oportet, et vere profitetur, *numquam* vo-

lui

\*) conf. LUCIAN. in Hippia p. m. 741. T. II.

\*\*) SENECA. De Constant. Sap. c. I. p. 249. I.

\*\*\*) SENECA. Ep. 4 p. II. T. II.

\*\*\*\*) SENECA. Ep. 29. p. 94. II.

*lui populo placere: Nam quae ego scio, non probat populus: Quae probat populus, ego nescio.* Contra omnis opera danda est, *vt malum mibi placere, quam populo, vt aestimem iudicia, non numerem rel.* Hinc ex fide ac arte omnia peragenda sunt, non ex assensione temeraria, et vere statuit Illustr. TRILLERVS \*), probi medici esse, conseruare potius, quam immutare naturam, et artem ipsam profanare.

## §. XXI.

Neque vero ferendae aequo animo sunt hominum malemoratorum iniuriae iocique putidi, quia audiri ac excipi, saluo medici honore, non possunt. Quae enim reuerentia, qui honos, ei habendus est, qui vietis vel calamistratis facetiis seipsum ridiculum fieri et in contemtionem adduci patitur? Innumerae molestiae deuorandae medico sunt, quae ab officio non licet sejungere; Num nouae temere subeundae? Num potentiorum \*\*) iniuriae bilari vultu patienter ferendae? Facient iterum, si se fecisse crediderint. Paucorum est, omnium minime medici, iniurias accipere et gratias agere. Quare aut dignitas integra seruari debet, vim vi repellendo, et conuicia, quanta fieri potest humanitate, refellendo, aut locus deserri, si ratio personae habenda est, quia scurrum quaerunt, non medicum. *Nam qui peccare se nescit \*\*\*), corrigi non vult*, et irrita opera omnis est. Tunc malum solus, quam cum risoribus esse, ac quaestuosam mercaturam facere. Nec

E 3

femina,

\*) Progr. De probi med. officio in conseru. potius, quam immutanda natura, Viteb. 1772.

\*\*) SENECA. De Ira II. 33. p. 54. I.

\*\*\*) SENECA. Ep. 18. p. 93.

femina, nec medicina vendibilis viro bono placet, neque ego amo satyras, quae culinam, opificium, oleum vel tabernas lucratius olen. Has iis relinqu, quibus sanum sinciput non est.

## §. XXII.

Restat pessimum medicorum genus, quod dum reproto, an pro his habendi sint, haereo. Eos vero puto, qui quiduis audendi et faciendi copiam habere se credunt, vt famam et numos adipiscantur, et *seruilia ministeria* obire non dubitant. Sunt hoc ex genere (puto), quo quis mane domicilia diuitum inuisere, cubicula femellarum inire, non vt current corpora, sed manus pedesque basient, vel vngues eleganter, si dis placet, purgent ac praefecent, fores hominum delicatulorum sibique placentium mirifice pulsare, vt perofficiose moneant, instare tempus sanguinis mittendi vel pharmaci menstrui, nasutulis ancillis affatim ad blandiri, vt dominae impensius commendent; gesticulatorio cultu uti, vt placeant; iis, qui excelsiori loco constituti vel bene numati sunt, spuma curiosius detergere, cucurbitas admouere et lotiones ventris dare, varos, lenticulas et ephelidas curare, puerorum vlera manantia, achores, fauos, tineas, superinungere ac petine purgare sedulo, vt matribus gratos se faciant cet. Haec et id genus alia molienti medico comes et socius esse recusat optimus quisque: Nam qui se ipsum contemnit, dignus est, qui male apud bonos audiat, et seruorum de grege existimet. Interim hoc animi vitium iis prae ceteris inesse memini, qui in alias, tanquam exempla, intuiti, malo suo genio indulserunt, atque e tonsoribus et balneatoribus medicos sese effin-

effinxerunt. Hi enim crimen turpitudinis subire facile pos-  
funt, siquidem *leuia ingenia* \*), quia nihil habent, nihil sibi  
detrahunt, et verissime huc MARTIALIS \*) iocum accommo-  
des:

*Chirurgus fuerat, nunc est Vespollo Diaulus:*

*Coepit, quo poterat, clinicus esse modo.*

Ne quid vero detrimenti res publica medicorum exinde ca-  
piat, ii videant, quibus per priuilegia principum ius fasque  
est, tales homunculos eo, vnde progressi imprudenter erant  
i. e. in tonstrinam et balnearia relegandi. Etenim ob igno-  
rantiam et turpia facinora, et arti suae sunt dedecori, et sibi  
quam maxime oneri.

### §. XXIII.

Tandem vero res non heri ac nudius tertius, sed inde  
a priscis temporibus eo rediit, vt, praeeunte verbis LONICERO,

*Fingant se medicos doctos, idiota, sacerdos,*

*Iudaeus, monachus, histrio, rasor, anus,*

*Miles, mercator, cerdo, nutrix et arator:*

*Decoctor, Lamia et pharmacopola, magus.*

et charlataneria ita peruersit medicorum animos, vt non de-  
sint \*), qui iis eam propriam et domesticam quasi esse putent,  
et sub auctore COTTA \*\*) mirabile videri dicant, quod non  
rideat medicus, cum medicum viderit: hoc mirabilius, quod  
inter se risum tenere possint.

Pudet me pigetque publice profiteri, quosdam, etsi  
artis

\*) CELS. De Medic. VIII. 4. p. 515.

\*\*) L. I. Epigr. 87. et 104.

\*) V. MENCKEN Charlat. Orat. II. p. 206. vers. germ. IVCH. Diff.  
De charlataneria medica, Erford. 1747.

\*\*) Ap. cic. De Nat. Deor. I. 26.

omnium disciplinarum rudes, plebi fucum offundere, audacter  
vovere, secare, curare et tollere e medio, apud imperitos et  
artis expertes famam nomenque quaerere, circensi pompa et  
oratoria priuilegiorum titulorumque declamatione gesticulari.  
vt phalerati σφραγίδονυχαργομηται solent, medicamenta  
vniuersalia et specifica, arcana, sympathetica, magnetica,  
electrica, panaceas, crepare, inutilia magni venditare, per  
sigilla, charakteres, vocabula et formulas sacras, quibus nulla  
subiecta est notio morbos fugare velle, herbas sub certo  
stellarum coetu colligere, vrinas gustare, et inde signa, quae  
nusquam sunt, deriuare, mire se iactare ac thrasonico more  
sexcentas curationes effundere, innumeratas pyxides et instru-  
mentorum multitudinem ostentare, sibi videri sapientissimos  
et MENE CRATEM arrogantem imitari, omnia habere venalia, con-  
scientiam, pudorem, valetudinem, mortem, et quoscunque fal-  
lere, decipere, emungere, omnia denique exaggere, vt magnam  
de se opinionem excitent, et si, CELSO \*) iudice, his trionis est,  
paruam rem attollere, quo plus præstitisse videatur cet. His-  
ce enim technis et officiis ars ipsique medici in taedium  
ac calumniam transfire debent, et iis, quibus

*De meliori luto finxit præcordia Titan,*  
risum ac stomachum mouere. Nec iniuria. Quis enim tam  
stultus ac credulus est, vt hanc impudentissimorum hominum  
vaniloquentiam patienter ferat? Rideantur ergo, sibilo exci-  
piantur, eiificantur e bonorum societate ac contubernio, et  
nauigent Anticyras, si qua salutis spes supereft.

#### §. XXIV.

Perspectis iis, quae vberius (spero) demonstrata sunt,  
mirari

\*) De Medic. V. 26. n. I. p. 283.

mirari tandem aliquando desinamus, quid sit, quod plurimos medicorum fortunatos putare non liceat. Nam cum sine litteris et prudentia medicinam facere conantur, consequens est ac consentaneum, ut in perarduo isto negotio identidem offendant, et fata hominum accersant, non auertant. Ciuium vero est, tales bonos viros deuitare, et sibi suisque melius, ac solent, consulere.

## §. XXV.

Plura dicenda forent, quae medicum commendatoris famae faciunt, puta, *bona ac carnosa corporis habitudine* \*) *praeditum esse*, *quia vulgus existimat, eos, qui non sic bene dispositum corpus habent, neque aliis bene prospicere posse; vestitu\*\* decoro esse*: nam hic animi proditor esse solet: *vnguentis odoratis non diffluere, quia, ut recte poeta, non bene olet\*\*\**), *qui bene semper olet, et aegris officit rel.* Sed temporis scriptorisque academicae angustiis prohibeor, quo minus singula percenseam, ideoque auctor suasorque fuerim medicis, ut nec in hac re, si per valetudinem et dignitatem fieri possit, commodis suis officiant ac obstent, vel in odium offensionemque populi cendant. Nam quo magis doctrina, prudentia, officio non simulato, gratia, fide bona, de ciuibus bene promiseri conabuntur, eo minus iis bonas felicitates omnes aduersas fore arbitror.

F

THESES

\*) Sic HIPP. L. De Medic. §. I. p. 44.

\*\*) HIPP. L. Decent. Ornat. §. 2. p. 53.

\*\*\*) MARTIAL, L. II. Epigr. 12. conf. HIPP. Praecept. §. 9. p. 65.



---

---

THESES MEDICAE

---

- I. Irritabilitas Halleriana est princeps vitae animalis caufa et origo.
- II. Omnis hypothesis, quoad eius fieri potest, vitari debet in physiologia, cum maxime in pathologia et therapia.
- III. Omnis febris ab irritabilitate dimanat.
- IV. Pathologia animata, quoad aetiologiam, nulla est.
- V. Infantes in utero occidere, in quibusdam casibus licitum esto.
- VI. Nullus morbus sine suis signis est.
- VII. Medicus bonus et perfectus sine assidua scriptorum medicorum lectione nemo est.
- VIII. Infra dignitatem professoris est, ab HIPPOCRATIS veterumque medicorum lectione auditores arcere, vel principes illos indicta caufa et generatim spernere.
- IX. Professoris fidi et prudentis est, in collegio clinico nihil temere dicere vel oscitanter agere, nulla medicamenta obsoleta vel inutilia commendare, nullas formulas, quae sexcentis rebus componuntur, calamo excipendas dare, ne quid detrimenti ars medicinalis capiat.
- X. Diaeteticam negligere, nefas esto.
- XI. In morbis inueteratis, praesertim spasticis, asa faatida ceteris medicamentis longe antistat.
- XII. In lue venerea non licet semper ac ubiuis mercurium adhibere.

- I. Irritabilit  
et origo.
  - II. Omnis h  
physiologi
  - III. Omnis
  - IV. Pathole
  - V. Infantes
  - VI. Nullus
  - VII. Medic  
corum le
  - VIII. Infr  
veterum  
cipes illa
  - IX. Profess  
temere a  
leta vel  
centis r  
quid dei
  - X. Diaete
  - XI. In mo  
ceteris
  - XII. In l  
adhiberi

© The Tiffen Company 2007

**TIEEN® Color Control Patches**